

02. maj 2017

Utoqqarnut immikkut siunnersuisarfimmik pilersitsinissamik pisariaqartitsineq periarfissarlu pillugit kingusinnerpaamik 2017-imi kommuninik oqaloqatiginninnissamik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut. Kommuninik oqaloqatigiinnerit inernerit iliuuserisassatullu eqqarsaatigisat utoqqaallu siunnersorneqarnerisa patajaallisarneqarnissaanut aningaasaliinissamut periarfissat kingusinnerpaamik UPA2018-mi allakkatigut Inatsisartunut nalunaarusiarineqassapput.

(Inatsisartunut ilaasortaq Debora Kleist, Inuit Ataqatigiit)

Inatsisartunut ilaasortap Debora Kleist-ip aalajangiiffigisassatut siunnersuutaanut Siumumiik imaattumik oqaaseqassuugut.

Siumumiit siunnersuummut taamatut ittumut qujassuteqarpugut. Pingaarteqarpummi utoqqaat inuiaqatigiinni allatuulli pisinnaatitaaffimminnik nalornissuteqaratik utoqqalinertik eqqissillutik atussagaat.

Naalakkersuisooqatigiinnissami isumaqatigiissutigisatsinni utoqqaat pillugit politikkitsinni inuup naleqassusaa aallaavigissallutigu isumaqatigiissutigaarput, siunertaraarput toqqissisimaneq pitsaasuserlu.

Tassunga atatillugu ilanngullugu oqaatiginngitsoorusunngilarput aammattaq Kommuuneni utoqqaat atugaasa utoqqarnut innarluutilinnullu ataqqinnittumik pisinnaatitaaffinnik atorluaanerunissaannik qulakkeerinninniarneq siunertaralugu siunnersortinik pilersitsinissaq sulissutiginiarneqarmat.

Siunnersuuteqartup siunnersuisarfimmik pilersitsinissaq siunnersuutigivaa. Taanna tunngaviatigut Siumumiit tamakkiisumik taperseratsigu oqaatigissuarput.

Oqaatiginngittoorusunngilarputtaaq aningaasanut inatsisissap 2017 – imut tunngatillugu isumaqatiginninniarnemi Siumumiit kissaatiginikuusarput, allaffissornikkut siunnersortimik pilersitsisoqarnissaa suliarineqassasoq.

Siunnersortimik atorfinititsissagutta assersuutigalugu suliassai makkuussapput:

1. Utoqqalinersiaqarnernut tunngasunik qaammarsaanerit (Inatsit)
2. Angerlarsimaffinni pisariaqartitanut akisuunut pisisariaqalernemi akilersuisitseriaatsit inornartut naleqqussarneqarsinnaanerit.
3. Utoqqalereersut utoqqalinersiutaannarnillu isertitaqartut sulisinnaalluarallaramik pilersikkusutanik tunngavilinnik akiittoqalersimasut qaangiiniarneranni siunnersuineq.
4. Nammineq illoqartut periarfissaasa piginnaatitaaffiisaalu qaammarsaavigineqarsinnaanerit.
5. Allallu kattuffik peqatigiiffiillu suleqatigalugit pisariaqartinneqartunut suleqataalluarsinnaasoq.

Qulaani taasaminnguagut eqqarsaatigalugit Siumumiit kissaatiginerusarput tassaavoq piaartumik Kommunit suleqatigalugit siunnersortimik akileeqatigiilluni atorfinittisisinnaaneq Utoqqaat kattuffiat peqatigalugu misissorneqassasoq.

Taama Siumumiit oqaaseqarluta siunnersuut aappassaaneerseqartinnagu Ataatsimiititaliamut susassaqtumut suliaannngorlugu ingerlatinneqassasoq innersuussutigaarput.

Jess Svane
Siumut